

STATISTIKAT E BLEGTORISË

2025

Në vitin 2025, blegtoria në Shqipëri ka shënuar disa ndryshime të rëndësishme në strukturë dhe prodhim, krahasuar me vitin paraardhës.

Gjedhët

Numri i gjedhëve është rritur me 1,1 %, nga 272 mijë krerë në vitin 2024 në 275 mijë krerë në vitin 2025. Megjithatë, numri i lopëve ka shënuar një rritje me 0,8 %, duke u rritur nga 224 mijë në 226 mijë krerë.

Të leshtat

Numri i përgjithshëm i të leshtave në vitin 2025 ka rënë me 0,9 %, nga 1.177 mijë në 1.166 mijë krerë, krahasuar me 2024. Delet, si kategoria më përfaqësuese, kanë shënuar një rënie më të theksuar prej 3,8 %, nga 968 mijë në 932 mijë krerë.

Të dhirtat

Në vitin 2025, janë regjistruar 570 mijë krerë të dhirta, me një rënie prej 7,4 %, krahasuar me një vit më parë 615 mijë. Brenda kësaj kategorie, numri i dhive është ulur me 7,9 %, nga 501 mijë në 461 mijë krerë.

Derra

Rënia më e madhe është regjistruar në kategorinë e derrave, me një ulje prej 28,2 %, nga 104 mijë në 75 mijë krerë. Brenda kësaj kategorie, numri i dosave është reduktuar me 13,6 %.

Shpendët

Edhe pse numri total i shpendëve ka shënuar një rënie të lehtë prej 0,5 %, nga 6.992 mijë në 6.953 mijë, numri i pulave ka pësuar një ulje më të theksuar prej 8,3 %, duke zbritur nga 4.557 mijë në 4.178 mijë.

Njëthundrakët

Numri i njëthundrakëve ka zbritur nga 58 mijë në 57 mijë krerë, që përfaqëson një rënie me 3,2 %.

Koshere bletësh

Numri i koshereve të bletëve është rritur me 9,8 %, nga 587 mijë koshere në vitin 2024 në 645 mijë koshere në vitin 2025.

Prodhimet Blegtorale

Qumështi

Prodhimi i përgjithshëm i qumështit është ulur me 0,1 %, duke kaluar nga 876.688 tonë në vitin 2024 në 868.281 tonë në vitin 2025. Qumështi i lopës mbetet burimi kryesor, duke përbërë 85,7 % të totalit, ndjekur nga qumështi i deles me 7,1 % dhe ai i dhisë me 7,2 %.

Mishi

Prodhimi i mishit në peshë të gjallë ka pësuar një rritje me 2,5 %, nga 130.334 tonë në 133.604 tonë.

Vezët

Edhe pse në vitin 2024 u prodhuan 888 milionë vezë, në vitin 2025 prodhimi ka rënë në 837 milionë, me një ndryshim prej -5,8 %.

Mjaltë

Prodhimi i mjaltit është rritur me 6,0 %, nga 5.940 tonë në 6.299 tonë.

Numri i krerëve të blegtorisë sipas qarqeve, 2025

Qarqet me numrin më të lartë për mbarështimin e gjedhit për vitin 2025, janë Fieri me 13,9 % dhe Korça me 12,6 %, ndaj numrit gjithsej të gjedhëve.

Përqëndrimi më i madh i numrit të të leshtave është në qarkun e Vlorës me 26,5 % dhe në qarkun e Gjirokastrës me 17,3 %, ndaj numrit gjithsej të krerëve.

Gjithashtu, në qarkun Vlorë dhe Gjirokastrë është përqëndrimi më i madh i numrit të të dhirtave me 24,0 % me 16,4 %, ndaj numrit gjithsej të krerëve.

Numri më i lartë i kategorisë së derrave është shënuar në qarkun Lezhë me 38,6 % dhe në qarkun Shkodër me 32,7 %, ndaj numrit gjithsej të krerëve.

Shënim për përdoruesit: Të dhënat e detajuara mujore dhe vjetore sipas grupeve janë të disponueshme në databazën statistikore të INSTAT: [Statistikat e Blegtorisë](https://www.instat.gov.al/)

Metodologjia

Statistikat e blegtorisë për vitin 2025 mbështeten në të dhënat administrative të mbledhura nga Ministria e Bujqësisë dhe Zhvillimit Rural. Mbledhja, përpunimi dhe publikimi i statistikave të blegtorisë dhe i prodhimeve blegtorale mbështeten në:

- Ligj Nr. 17/2018 “Për Statistikat Zyrtare”;
- Ligj Nr. 30/2022 “Për miratimin e Programit të Statistikave Zyrtare 2022 – 2026;

Sipas specifikimeve të dhëna në RREGULLOREN (BE) 2023/2745 të Parlamentit Evropian dhe të Këshillit të datës 8 dhjetor 2023, mbi statistikave të integruara të fermave dhe shfuqizimin e Rregulloreve (KE) nr. 1165/2008 dhe (BE) nr. 1337/2011.

Informacioni mblidhet në terren nga specialistët e ekstensionit në të gjithë vendin. Këta specialistë mbledhin të dhëna drejtpërdrejt nga fermerët. Të dhënat blegtorale grumbullohen për numrin e kafshëve që mbarështojnë fermerët, si dhe për prodhimet blegtorale. Specialistët e ekstensionit i krahasojnë këto të dhëna me të dhënat e shërbimit veterinar, i cili kryen matrikullimin dhe vaksinimin e kafshëve (procesi është në vazhdimësi). Shërbimi veterinar kryen, në momentin e vaksinimit, inventarin e kafshëve në nivel komune. Specialistët e ekstensionit kanë gjithashtu bashkëpunim me veterinerët privatë, të cilët ofrojnë shërbime të ndryshme në mënyrë private pranë fermerëve (si kontrolle për sëmundje, ngordhje të kafshëve, lindje, therje, vaksinime etj.). Në fund, specialistët e ekstensionit krahasojnë të dhënat nga të tre burimet. Ata mbledhin gjithashtu të dhëna për prodhimet bujqësore dhe blegtorale nga fermerët. Të dhënat për rendimentin e prodhimeve mblidhen nga fermat më përfaqësuese në nivel komune. Të dhënat e grumbulluara dërgohen në Ministrinë e Bujqësisë dhe Zhvillimit Rural, ku specialistët e prodhimit blegtoral bëjnë vlerësime duke i krahasuar ato me të dhënat e fermave ndër vite.

Ministria e Bujqësisë përdor tre burime informacioni për grumbullimin e të dhënave:

1. Ekspertët e ekstensionit që janë pjesë e strukturave të Drejtorive të Bujqësisë
2. Shërbimin veterinar
3. Veterinerët privat

Përkufizime

Njësia Ekonomike Bujqësore (NJEB) - është njësi e vetme, teknike ekonomike, e përcaktuar në një drejtim unik nga terreni, edhe pse në parcela jo të vazhdueshme, në të cilën realizohet prodhimi bujqësor dhe blegtoral që drejtohet nga një person i vetëm ose grup personash, për realizimin e veprimtarive bujqësore – blegtorale.

Njësi ekonomike bujqësore konsiderohen edhe njësitë ekonomike me drejtim të plotë blegtoral, në të cilat arrihet mbarështimi i kafshëve pa pasur në administrim tokë bujqësore, pra ku toka nuk figuron si element përbërës i njësisë.

Njësia e gjedhit - Njësia e gjedhit, e shkurtuar si LSU (Livestock Unit), është një njësi referimi që lehtëson agregimin dhe krahasimin e bagëtive nga specie dhe mosha të ndryshme, nëpërmjet përdorimit të koeficientëve specifikë, të vendosur fillimisht në bazë të kërkesave ushqimore, për çdo lloj kafshe. Njësia referencë e përdorur për llogaritjen e njësive blegtorale (=1 LSU) është ekuivalenti i një lope për qumësht që prodhon 3 000 kg qumësht në vit.

Blegtoria dhe shpendët Blegtoria dhe shpendët përfshijnë të gjitha kafshët, pavarësisht moshës, vendndodhjes ose qëllimit të mbarështimit. Kafshët mund të jenë të pranishme në njësinë ekonomike bujqësore ose jashtë fermës, në kullota.

Klasifikimi i kafshëve bëhet sipas llojeve (gjedhë, të leshta, të dhirta, derra, kuaj), sipas moshës, seksit dhe destinacionit ekonomik.

Shpendët janë të grupuar në një grup të vetëm dhe përfshihen pulat, pulat afrikane, gjela deti, pata, rosa, etj.

Prodhim mishi peshë e gjallë

Vlerësimi për prodhimin e mishit peshë e gjallë kryhet për çdo lloj kafshe. Llogaritja e prodhimit të mishit peshë e gjallë bazohet në përlllogaritjet e bëra nga lëvizja e blegtorisë, pra në numrin e krerëve të skartuar për gjedhë, të leshta, të dhirta, derra dhe shpendë, sipas kategorive të therjes, dhe në peshën e gjallë mesatare për krerë të therur sipas llojeve dhe kategorive të therjes.

Rregullat kryesore për grumbullimin e të dhënave

Numri i krerëve të blegtorisë i referohet datës 1 Dhjetor 2025.

Fermeri pyetet për të gjitha llojet e kafshëve që ai zotëron.

Informacioni grumbullohet vetëm për numrin e krerëve që ka në zotërim njësi ekonomike bujqësore

Të gjitha kafshët e blera nga ekonomi të tjera gjatë vitit numërohen.

Të gjitha kafshët e shitura në ekonomitë e tjera gjatë vitit nuk numërohen.

Lindjet në blegtori janë të gjitha lindjet gjatë 12 muajve të fundit. Nuk përfshihen kafshët e lindura të ngordhura.

Humbjet e kafshëve gjatë vitit (ngordhje, sulme nga egërsirat apo shkaqe natyrore) nuk numërohen.